

ACORDO DE PRÓRROGA PARA O ANO 2019 DO CONVENIO DE COLABORACIÓN ENTRE A CONSELLERÍA DE POLÍTICA SOCIAL E A FUNDACIÓN CAMIÑA SOCIAL PARA LEVAR A CABO UNHA INTERVENCIÓN EDUCATIVA INTEGRAL CON PERSOAS MENORES QUE TEÑAN QUE CUMPRIR MEDIDAS XUDICIAIS E OUTRAS ACTUACIÓNS EN MEDIO ABERTO PREVISTAS NA LEI ORGÁNICA 5/2000, DO 12 DE XANEIRO, REGULADORA DA RESPONSABILIDADE PENAL DOS MENORES, NA PROVINCIA DA CORUÑA.

MEMORIA XUSTIFICATIVA

A directora xeral de Familia, Infancia e Dinamización Demográfica da Consellería de Política Social
DECLARA:

Que a consellería de Política Social formaliza coa fundación Camiña Social o acordo de prórroga para o ano 2019 do instrumento convencional arriba referido, por un período de vixencia que abrangue dende o 1 de xaneiro de 2019 ao 31 de decembro de 2019.

Que o instrumento convencional ten por obxecto regular a colaboración entre a Consellería de Política Social e a Fundación Camiña Social para levar a cabo unha intervención educativa integral con persoas menores que teñen que cumprir medidas xudiciais e outras actuacións de medio aberto previstas na LORPM na provincia da Coruña.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no seguinte:

Primeiro. Que a LORPM establece no seu artigo 45 que a execución das medidas adoptadas polos xulgados de menores nas súas sentenzas firmes corresponde ás comunidades autónomas, que poderán establecer os convenios ou acordos de colaboración necesarios con outras entidades, ben sexan públicas ou privadas sen ánimo de lucro, para a execución das medidas da súa competencia, baixo a súa directa supervisión, de acordo cos principios de cooperación e colaboración, e sen que isto supoña en ningún caso a cesión da titularidade e responsabilidade derivada da súa execución.

Segundo. Que lle corresponde á Consellería de Política Social, a través da Dirección Xeral de Familia, Infancia e Dinamización Demográfica, a execución das medidas ditadas polos xulgados de menores, nos termos establecidos na LORPM, de acordo co sinalado no artigo 13 do Decreto 176/2015, de 3 de decembro, polo que se establece a estrutura orgánica da consellería de Política Social.



Terceiro. Que a execución das medidas xudiciais ten por obxecto procurar a reinserción e reeducación das persoas menores infractoras. Isto require unha intervención que debe ser levada a cabo por un equipo multidisciplinar de profesionais especializados nas áreas psicosocial e educativa, que dean resposta ás especiais características que presenta o colectivo obxecto de atención: carencia de ferramentas e habilidades sociais, cognitivas, e/ou laborais; pertenza a familias desestruturadas, multiproblemáticas e/ou permisivas e con poucos ou ningún referente social positivo; presenza frecuente de consumo de substancias nocivas para a saúde; alto grao de absentismo e fracaso escolar; baixa autoestima, autoconfianza e tolerancia á frustración. Ás anteriores variables súmanse con frecuencia especificidades como a condición de emigrante ou a orixe étnica, que engaden novos condicionantes como a inexistencia de referentes familiares, problemas de documentación ou barreiras idiomáticas ou culturais.

Cuarto. Que dado que a administración non conta cos medios materiais e persoais necesarios para a execución das medidas non privativas de liberdade e co obxecto de garantir o correcto desenvolvemento desta competencia que a LORPM lle atribúe, considerouse necesario acudir a fórmulas colaborativas con entidades privadas para o desenvolvemento da actividade, ao abeiro do establecido nos artigos 45 da LORPM e 8 do Decreto 1774/2004, do 30 de xullo, polo que se aproba o regulamento da LORPM.

Quinto. Que o carácter singular da intervención determinou a necesidade de establecer un convenio de colaboración con entidade especializada na intervención con menores de cara á consecución de obxectivos compartidos, encamiñados á inserción e reeducación da persoa menor, que realizará a súa función sen unha compoñente lucrativa, prestando a súa colaboración a cambio exclusivamente dunha compensación polos gastos ocasionados polo exercicio da actividade, conservando a administración a responsabilidade da execución das medidas xudiciais, tal e como establecen os citados artigos 45 da LORPM e 8 do regulamento.

Sexto. Que dada a existencia dunha pluralidade de entidades entre cuxos fins se atopa a intervención socioeducativa con persoas menores, capacitadas para desenvolver os programas de intervención con menores, valorouse necesaria a articulación dun procedemento de selección que garanta os principios de publicidade, transparencia, concorrència, obxectividade e non discriminación, co fin de que se realice unha execución axeitada das medidas en beneficio do menor e tendo en conta os seus intereses.

Sétimo. Que o día 18 de febreiro de 2016 publicouse no DOG a resolución do 11 de febreiro de 2016 pola que se convoca o procedemento de selección de entidade privada sen ánimo de lucro para levar a cabo unha intervención educativa integral con persoas que teñan que cumprir medidas xudiciais e outras actuacións en medio aberto previstas na Lei orgánica 5/2000, do 12 de xaneiro, reguladora da responsabilidade penal dos menores, na provincia da Coruña.



Oitavo. Que unha vez resolto o procedemento de acordo co establecido no anexo I da devandita resolución o día 1 de setembro de 2016 a Consellería de Política Social subscribiu un convenio de colaboración coa fundación Camiña Social para levar a cabo unha intervención educativa integral con persoas menores que teñan que cumprir medidas xudiciais e outras actuacións de medio aberto previstas na LORPM na provincia da Coruña.

Noveno. Que de acordo co establecido na cláusula oitava do convenio este ten efectos dende o 1 de setembro de 2016 ao 31 de decembro de 2017 e poderá prorrogarse por acordo expreso das partes por períodos sucesivos, non superior cada un deles a un ano, ata un máximo de 2 anos, todo iso condicionado á existencia de crédito axeitado e suficiente nos exercicios correspondentes.

Décimo. Que o 22 de decembro de 2017 se asinou a prórroga do convenio de colaboración para o ano 2018.

Décimo primeiro. Que a prórroga do convenio de colaboración para o ano 2019 permite garantir a continuidade da execución das medidas non privativas de liberdade e outras actuacións de medio aberto na provincia da Coruña.

Décimo segundo. Que os intereses converxentes das partes asinantes exclúen o ánimo de lucro e non poden satisfacerse axeitadamente mediante a celebración dun contrato dos contemplados no Texto da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014.

En atención ao exposto, e co fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estímase xustificada a sinatura da prórroga do instrumento convencional que se pretende, coa exclusión doutras figuras.

E para que conste, asíñase esta memoria.

A directora xeral de Política Familiar, Infancia e Adolescencia

María Amparo González Méndez

